

TEN-BUNBUN-LA PIITA SI N̄MUNSA

¹ Mi-na Piita si ɲaa Yesu Kirisito nan̄zɔɔ, mi n̄ n̄mun̄se teniɲ deen̄ a pipi ma nialin̄ kala si laa Yesu wiaa dii an̄ tin̄ h̄eɛɲ wiaa a pise a h̄e Pɔɲtɔs l̄e, Galiisia, Kapadoosia, Esia, ari Bitiinia tin̄teen̄ kala l̄e. ² Faafaa kala n̄e la Nyimma Wia biine ari u maga di ma ɲaa u niaa, ɲii n̄e tii u liisema a jon̄ u Diɲ-zɔɲ-la a h̄ema l̄e, di ma ɲaa tuɔ-pul timma u teen̄ a tuto Yesu Kirisito niin̄. U n̄e jon̄ u chalin̄ jaase ma wiaa di ma sí disinnin̄ k̄eɲ Wia teen̄. La Tiina Wia lah̄orim̄ɔ, yarifielaa jan̄ yuge ma teen̄.

Wialin̄ la s̄ii yielu

³ Má leɲ di la d̄enne Wia, nii-la si ɲaa la Tiina Yesu Kirisito Nyimma. U fála nennige kin̄k̄eɲ. ɲii n̄e tii la wuo k̄eɲ mii-falin̄ deen̄, b̄eɛ wiaa Yesu Kirisito suba an̄ sii suun̄ l̄e n̄e. La saa yiele ari la jan̄ k̄eɲ miisi-la si bi d̄ere. ⁴ La maa yiele ari la jan̄ dii ku-zɔmɔ-la Wia si ɲaa bil u niaa l̄e u jan̄ l̄e. Kialin̄ bi jan̄ pua, ba bi jan̄ chei maa, ba zomun̄ ma bi jan̄ lii. ⁵ A tin̄ ma si laa u wiaa dii ɲii, Wia ben̄ma n̄e. Di dunia n̄e ku didere, u jan̄ dage niaa ɲii u si laama ta. ⁶ Kialin̄ ma si jan̄ na Wia teen̄ leɲe ma tuɔɲ faasa t̄ɔre. L̄eɛɛ ɲla-na ma tuɔɲ cheye n̄e, b̄eɛ wiaa h̄eɛɲ juuma n̄e. Ama ma jima ari h̄eɛ-la si juuma, u bi jan̄ dieni. ⁷ H̄eɛ-la jan̄ leɲ di niaa wuo na ari wialin̄

ma si laa dii-na sene n̄aa wutitiiba n̄e. Ba zom̄o a kii selime si zom̄o nii. Selime n̄aa dunia n̄aa kuchoolii n̄e. Ba yie jono cho n̄e a yugile di ba na u sene n̄aa selime n̄ee? Nii titia n̄e ma ma nage. Ba magisema nii di Yesu Kirisito n̄e miira ko tapulii-la, n̄aa jan denne Wia a zizilu duu yirin̄ yire a tin̄ wialin̄ ma si laa dii wiaa. ⁸ Ari ma ha si bi Yesu Kirisito na ma kala, ma ha chou n̄e. Ma si buu na ma ha, ma laa u wiaa dii n̄e. Nii wiaa, ma tuon̄ t̄ore kin̄ken̄ kin̄ken̄ n̄e. Ma paala bi ma tuot̄orun̄ wuo didage. ⁹ A tin̄ ma si laa Yesu wiaa dii nii, nii n̄e tii Wia laama ta.

¹⁰ Nialin̄ fa s̄ii bul wiaa, Wia Din̄-zon̄-la dolun̄ le fa bul wu-zomun̄ deen̄ Wia si jan̄ jono pima wiaa n̄e. Ba fa gbilli Wia tenin̄ tuon̄ ari siif̄esin̄ di ba na nii Wia si jan̄ laa u n̄aa ta. ¹¹ Yesu Kirisito Din̄-zon̄-la fa si heba le, u n̄e bula piba nii Kirisito si jan̄ na heen̄, ka di n̄aa-na zizilu. Nii n̄e ba ninerike di ba na bua-la le wiaa deen̄ba si jan̄ n̄aa ari nii ba si jan̄ n̄aa. ¹² Wia jono dageba ari ma wiaa n̄e tii ba faa bul wiaa deen̄ba, ba titia wiaa dee. Leele nialin̄ si bul Wia wu-zom̄o-la pipima, ba dagema bun̄bun̄ wiaa deen̄ba kala n̄e. Wia Din̄-zon̄-la si lii Wia-jan̄ ku tuu heba le n̄e piba dolun̄ deen̄. Wia tin̄daaraa ma fa cho di ba na wiaa deen̄ba.

Nii Wia n̄aa si maga di ba nage

¹³ Nii wiaa, má len̄ di ma tuobiinaa pe don̄o le a ken̄ ma titia wii-na kala le. Má jon̄ ma yielaa kala he ku-la Wia si jan̄ jono pima bua-la le Yesu

Kirisito si jaŋ miira kɔ. ¹⁴ Má tuto Wia niin̄. Bua-la ɛ ma fa si bi Wia jin̄, ma faa to ma tuɔtɔɛ wu-ŋaalaa ɛ nɛ. Ma bira síba to. ¹⁵ Wia bi disinnin̄ kɛnɛ aŋ yirema. Nii wiaa, má ma sí disinnin̄ kɛŋ wii-na kala ma síi ŋaa ɛ, ¹⁶ bɛɛ wiaa ba ŋmuŋsa faafaa kala nɛ ari Wia si,

“Ma sí disinnin̄ kɛŋ, bɛɛ wiaa mi ma bi disinnin̄ kɛnɛ.”

¹⁷ N̄ si kɛŋ Wia yire ŋ Nyimma duu pɛŋ ɛ, liise yi ari duu ní dii niaa sariya, u biba kaa pɔɛ. U yie t̄in̄ nuu-kala ŋii nii-la si tima mage. Má saa fáu a leŋ di ma wu-ŋaalaa zɔŋ dunia deen̄ ɛ.

¹⁸ Ma kala jima ari Yesu Kirisito t̄in̄ ma chimin̄ a liisema wu-pɛiba ŋaanin̄ ɛ. Ma naabalimaba faa ŋaa wu-pɛi deen̄ba nɛ. U bi naga ari kialin̄ síi chei a nage selime koo moribiee nɛ u joŋo yɔɔma.

¹⁹ Ama Yesu Kirisito chalin̄ titia nɛ u joŋo t̄in̄ ma chimin̄. Moribiee bima wuo yɔɔ. Yesu nage piebie nɛ ba si liisa di ba kpu a pi Wia. U ŋaa Piebii-zɔŋ nɛ a bi wu-bɔŋ kala kɛnɛ. ²⁰ Bun̄bun̄ kala, ka di Wia-na ŋaa dunia, u liise Yesu Kirisito nɛ duu tou ɛ a laa dunia niaa ta. Dunia si ku kpage dɛrin̄, Wia leŋ u kɔ ma teen̄ duu laama ta. ²¹ Má tou ɛ a laa Wia wiaa dii nɛ. U nɛ chise Yesu suun̄ ɛ a pu yirin̄ di ma yarida ari ma yielaa kala hɛ Wia ɛ.

²² A t̄in̄ ma síi to wutitii won̄biin̄ ɛ ŋii, ma piise ma disinnin̄ kala ta nɛ. Ma si ŋaa ŋii, ma sɛnɛ cho ma naan̄biiri-la si laa Wia wiaa dii. Nii wiaa, má kɛŋ ma tuɔŋ ari ma dolun̄ kala a wasa cho dɔŋɔ. ²³ U naga ba wasa lulma nɛ a t̄in̄ Wia niin̄ wiaa si pi niaa miisin̄. Ba nɛ pima mii-falin̄. Ba bi jaŋ pua, ba jaŋ hɛ dime a kaa mu wuu. U

bi nage nuhuobiine sí suu ne pima miisinj deen. Ama Wia-la si bi suu ne pima. ²⁴ Ba ŋmunɔse Wia tenin tuɔŋ a bul,

“Nuhuobiine kala nage yan ne. U zomun kala nage ya-filaa ne. Yan-la hil, ka ya-filaa ma yuori. ²⁵ Ama Wia niin wialin jan he dime a kaa mu wuu.”

Wia niin wialin ne ŋaa wu-zomɔ-la ba si bula pima.

2

Piita bul wiaa a tige tabiin si ken miisinj

¹ Ma si ken mii-falin nii, má liise ma titia wu-bɔŋ kala le, a sí niaa nyinyisu, a sí kanfugi timma ŋaa. Ma sí yaribierin ken, a sí niaa hariŋ gigaa.

² Ama u maga di ma nage bii-mullun ne aa che yilin di ba wase a waa. U maga di ma ma chiche Wia niin wialin ari bii-mullun sí che yilin nii. Di ma ní che Wia wiaa nii, ma jan waa worun ba le, a mu yi tapulii-la Wia si jan laama ta. ³ Má ŋaa nii, beɛ wiaa ma titia jima ari la Tiina Wia ken zile ma teenj.

⁴ Nii wiaa, má ku kpage la Tiina Kirisito, nii-la si nage tabii-la si ken miisinj. Niaa viau ta, ama Wia ne liisu u ŋaa ku-zɔŋ u teenj. ⁵ Di ma ne kpagu, ma ma titia jan nage tabia-la si ken miisinj. Nii wiaa, má leŋ di Wia kenma saa u dia, lee-la u Diŋ-zɔŋ-la si jan he. Wia liisema di ma sí disinnin ken a laa niaa nyun a tima pupu, ari nialin fa si laa niaa nyun a kpu pusun pi Wia nii. Wia cho di ma to u Diŋ-zɔŋ-la le ne a tima pu

ari ma tuɔŋ kala, a tiŋ Yesu Kirisito wiaa. ⁶ Ba
 ŋmuŋse Wia teniŋ tuɔŋ a bul,

“Wia si, mi joŋ tabiiŋ ne a bil Zaayɔŋ le,
 tabii-duo-la mi si jaŋ kaa bil mi dia gentine.
 Mi liise tabii-la ne, u zɔmɔ pimi.
 Nii-la kala si laa u wiaa dii, hiisiŋ bi jaŋ dii
 u tiina.”

⁷ Ma nialiŋ si laa u wiaa dii, u ŋaa ku-zɔŋ ne
 ma teen. Ama ba ŋmuŋse Wia teniŋ tuɔŋ a tige
 nialiŋ si bi u wiaa laa dii le,

“Tiebie-la dii-saaraa si via,
 Wia leŋ u ku ŋaa tiebii-duoŋ ba si joŋo bil
 dia gentine.”

⁸ Ba bira ŋmuŋsa ari
 niaa jaŋ gere tabii-la a tel.

Tabii-la ŋaa buŋ ne.

Ba jaŋ tel, bee wiaa ba via Wia niŋ wialiŋ ne.
 Wia bul faafaa ne ari ba jaŋ ŋaa nii.

⁹ Ama Wia liisema di ma ŋaa u niaa, a laa niaa
 nyuŋ a tima pipi ma Kuoro. Wia titia ne tiima.
 Ma ne ŋaa nialiŋ Wia si liisa di ma ŋaa u niaa. U
 yirema di ma wuo bul wu-kpuŋkperisi-la kala u
 si ŋaa a pi niaa ari nii u si liisema birimiŋ tuɔŋ
 a kaa ku juu u puluŋ-jalii-la tuɔŋ. ¹⁰ Buŋbuŋ-la
 ma fa bi kuŋ-kala ŋaa, ama leele ma ŋaa Wia
 niaa ne. Wia fa bima nennige fá, ama leele u
 fáma nennige ne.

*Wialiŋ si maga di ma nialiŋ si laa Yesu wiaa
 dii ŋiŋaa*

¹¹ Mi naaŋbii-kpianaba, ma jima ma ŋaa
 nuhuɔraa ne a bi dieni dunia deen le. Nii wiaa,

mii sulma, má liise ma titia ma tuotore wu-
 nyaalaa le, bee wiaa ma tuotore wu-nyaalaa bi jaŋ
 sei di ma nya wialin sí tere Wia tuon. ¹² Ma si
 guoli nialin si bi Wia wiaa laa dii tuon, má ken
 ma titia woruŋ, di ba sí wonbiin na a bul ari ma
 nya ni-bomɔ ne. Di ba níi bul ma nya wu-bonɔɔ
 maa, má leŋ di ba na wu-zomɔ-la ma síi nya, a
 denne Wia duu yirin yire tapulii-la u si jaŋ dii
 niaa sariya. ¹³ A tin la Tiina Yesu Kirisito wiaa,
 má sei nialin si ken doluŋ aa beŋma dunia deen
 le. Má zizil ma tinteen kuori-balin, nii-la síi beŋ
 nuu-kala, ¹⁴ a bira zizil nialin kuori-balin síi liisa
 di ba laa u nyuŋ. Ba yie dudogise nialin síi nya
 wu-bonɔɔ, aŋ bibese nialin síi nya wu-zonɔɔ
 le. ¹⁵ Wia tuotoruŋ ne ɲla, di maa nya wialin síi
 to wonbiin a wuo leŋ di ni-yaara-la si bi wii jin,
 di ba sí wii wuo bul a tigema le. ¹⁶ Ma tii ma titia
 ne, nii wiaa má hon ari nialin si tii ba titia, aŋ
 sí leŋ di nii nya di ma nya wu-bonɔɔ. Ama má
 nya wialin si jaŋ dage ari ma nya Wia tintinnaa
 ne. ¹⁷ Má zil nuu-kala. Má cho nialin ma si laa
 Yesu wiaa dii a nya ma naanbiirin. Má fá Wia a
 zizil ma kuori-balin.

Má to Yesu naa-buasun

¹⁸ Ma nialin si nya tintinnaa a timaa pi niaa,
 má tuto ma nihiasin niin a zizilba bua-na kala
 le. Di ba ken zile koo di ba ne tere ma teen,
 má pipiba zile. ¹⁹ Di nuu ne bi wii cheye ka baa
 dogisu, a tin u síi to Wia nii, di tiina ne nyalima
 a na hee-la, u nya woruŋ ne Wia teen. ²⁰ Di ɲ ne
 nya wu-bon di ba dogisuŋ, ka ɲ wuo dii kenyiri
 nii le, u bi maga di ɲ chiche di ba lolluŋ. Ama

di η ní ηaa wu-zɔŋ, ka di baa dɔgisuŋ a tiŋ wu-zɔŋ-la wiaa, di η ne nyalima, Wia tuɔŋ jaŋ tɔre η nyuŋ. ²¹ Wia paala yirema di ma na heeŋ. Má liisi ari Yesu Kirisito titia ma na heeŋ ne ma wiaa a dagema nii ma si jaŋ to u naa-buasuŋ. ²² U bi wu-bɔŋ kala ηaa. U bi wu-nyiari kala nya. ²³ Ari niaa si tuusu ma kala, u biba laa tuuse. Ari nii ba si dɔgisu kala ma, u bi bula bul duu ma jaŋ dɔgiseba. U ta joŋ wii-kala a he Wia nisin le ne, nii-la si jaŋ keŋ wutitii a dii niaa sariya. ²⁴ Yesu Kirisito titia ne laa la haacheba a chuŋ, ba kpaasu mere daa-geseɛ nyuŋ di la joŋ harin yia haache a nɔŋaa tuɔ-pul wiaa. Ba viiru, chalin lii u yaraa le. U nii leŋe la nyanyalaa kala dere la yaraa le. ²⁵ Ma fa nage piesee si yenŋe ne, ama leele ma miira ko Pie-daari-la, nii-la si beŋ ma miisin pima.

3

Haalaa ari ba balaba si maga di baa ηaa nii dɔŋɔ le

¹ Ma haalaa, má leŋ di ma siaa tuu tinteen ma balaba teen. Di haala dɔŋɔ keŋ bala si bi Wia wu-zɔmɔ-la laa dii, u bala-la jaŋ wuo birima lii u wu-ŋaalaa le a laa Wia wu-zɔmɔ-la dii a tiŋ u haala mele si zɔmɔ wiaa, di haal-la ne paala bi Wia wu-zɔmɔ-la bula pu maa. ² Di ma ηaa nii, ba jaŋ na ma mele si zɔmɔ ari nii ma sí fá Wia. ³ Ma sí bibiinu nii ma si jaŋ lilaale kpieraa a zɔŋ nii, ari nii ma sí jaŋ vɔɔ ma nyuŋ duu zɔŋ, a sí selime kuŋ-kala joŋo he ma yaraa le di ma zɔŋ, a sí biine nii ma si jaŋ lilaale geri-zɔŋɔɔ.

⁴ Ama má leŋ di ma zomunj lii ma tuoŋ ne. Má hoŋ som a keŋ ma titia muuri. Zomunj deenj yirina bi lel. U ne bira keŋ nyuurunj ma Wia teenj. ⁵ Faafaa haala-la faa kpiere ba titia nii ne a joŋ ba nyunj ari ba yielaa kala he Wia le a keŋ ba siaa tuu tinteenj ba balaba teenj. ⁶ Nii ne haal-la ba síi yire Saara ma fa to u bala Abiraham niinj a kenu yiyire u tiina. Di ma níi ŋaa wialinj síi to woŋbiinj a sí leŋ di fawullunj keŋma wii-kala le, ma ŋaa Saara biirinj ne.

⁷ Ma baalaa maa, má leŋ di ma mele zonj a keŋ ma haalaa worunj. Ma jima di ma dolie kiiba ne. Nii wiaa, má pipiba zile, bee wiaa Wia ne pi ma kala miisi-la si bi dere. Di ma ne ŋaa nii, wii-kala bi jaŋ wuo ku he ma di Wia pege a chei ma Wii-chuolunj.

Ma sí wu-bonj joŋo tinj wu-bomunj chiminj

⁸ Wii-la mi síi che di mi bul wu-kaaninj ne ŋla: Má kala keŋ tuobiinj-bala ne, má fifá donjo nennige, a cho nialinj kala si laa Yesu wiaa dii, a keŋ zile donjo le, a keŋ ma titia muuri donjo teenj.

⁹ Ma sí wu-bonj joŋo tinj wu-bomunj chiminj. Di nuu ne tuusema, ma sí tuusa tinj, ama má sul Wia duu pe tiina le, bee wiaa Wia ma liisema ne duu pema le. ¹⁰ Ba ŋmunse Wia teninj tuoŋ a bul,

“Di nuu-kala níi che duu nii sima dunia deenj le
a keŋ tuotoronj,
tiina sí wu-bonjɔɔ bubul,
a sí wiaa ma nyinya.

¹¹ Tiina miire wu-bonjɔɔ ŋaaninj le,
a ŋŋaa wialinj síi to wutitii woŋbiinj,
a fiese siinj di ba tuosaa fiele donjo nyunj,

12 ɓɛɛ wiaa Wia siaa kala hɛ nialin sɪi ɲaa tuɔ-pul
wiaa lɛ nɛ,
a wuoli u digilaa maa a ninii ba Wii-sulunɗ.
Ama Wia jonɗ u harinɗ yia ni-bɔŋŋɔɔ nɛ.”

13 Di ma nɛ fiɛɛ siinɗ di ma wuo ɲiɲaa wu-
zɔŋŋɔɔ, kubɛɛ nɛ janɗ wuo ɲaa wu-bɔŋ ma lɛ?
14 Di ba nɪi dɔgisema maa a tinɗ ma tuɔ-pul wu-
ɲaalaa lɛ, Wia janɗ pɛma lɛ. Nii wiaa, ma sɪi nialin
si dɔgisema fá, a sɪi ma titia ma wiwalimu. 15 Ama
ma tuɔŋ lɛ má fifá Kirisito a leɗ duu ɲaa ma
Tiina. Bua-na kala lɛ, di nuu nɛ piɛsinɗ duu jinɗ
wii-la si tii ɲ laa Yesu wiaa dii, ɲaa siri a to wii-la
naasinɗ pu. N sɪi fá Wia ɲii, bul wii-la ari siifiɛlaa.
16 Bua-na kala lɛ, má leɗ di ma tuɔbiinaa chesi, di
ma wu-ɲaalaa dage ari maa to Kirisito nɛ. Di ma
nɪi ɲaa ɲii, hiisinɗ janɗ dii nialin sɪi chei ma yirinɗ.
17 Di u nɛ ɲaa Wia tuɔɔrunɗ di ma na hɛɛɲ a tinɗ
ma sɪi ɲaa wialin sɪi to wutitii wonɓiinɗ wiaa, u
nɛ kpia ma si ɲaa wialin si bi wonɓiinɗ ka to a na
hɛɛɲ. 18 Yesu Kirisito titia suu la haacheɓa wiaa
nɛ, duu wuo liisɛla la haacheɓa lɛ. U ɲaa ɲii
bala dunɗunɗ nɛ. U nɛ fa ɲaa tuɔ-pul tiina a suu
haache tinɲaa wiaa, duu wuo keɲla kaa mu Wia
teenɗ. Nuhuobiinee nɛ kpu u yaraa, ama Wia leɗ
u dima wei a keɲ miisinɗ. 19 Nii harinɗ u ni-dima
lɛ u mu bul Wia wu-zɔmɔ-la a pi ni-dinɗi-la ba
si kaa tɔ dia. 20 Niaa deenɓa nɛ fa via di ba to
Wia niinɗ wiaa bua-la lɛ Nowa fa sɪi kpaase liinɗ
dabori-bal-la. Bua deenɗ lɛ Wia fa keɲ kenyiri a
gbigberɛba di ba ku juu liinɗ daboro-la, ka ba via.
Bua-la lɛ niaa chori dunɗunɗ nɛ fa juu liinɗ dabori-
bal-la, a duori lii-la, a lii a laa ba miisinɗ. 21 Lii-la

tuon̄ ba si duoro lii nage ba si fo niaa Wii-chuōle liiñ n̄e. Di ba n̄e fon̄ Wii-chuōle liiñ, u bi naga ari ñ yaraa disinniñ n̄e ba chese ta ñii. Ba si fon̄ Wii-chuōle liiñ ñii, u naga la yie sul Wia duu to Yesu Kirisito le si sii suon̄ le a chese la tuosaa di ba zon̄. ²² U n̄e lii dunia le a jil Wia-jañ a hon̄ Wia seme, ni-duon̄ di-honun̄. U n̄e ken̄ dolun̄ a biben̄ Wia tin̄daaraa ari kun̄-kun̄-kala si ken̄ dolun̄ a he Wia-jañ le.

4

Má len̄ faafaa wu-ñaalaa

¹ A tin̄ Kirisito titia si na heen̄ ñii, má ken̄ ma titia a ñaa siri di ma na hee-la yiri u si na, bee wiaa nii-la kala si na heen̄, haache bira buu wuo. ² Ma si he ma mii-kaaniñ deen̄ le, ma bira sí ma tuotore wu-ñaalaa le to, ama má tuto Wia tuotoron̄ le. ³ Bun̄bun̄-la kala le ma faa ñaa wialiñ nialiñ fa si bi Wia jin̄ síi ñaa n̄e. Má len̄ wialiñ. Ma faa to ma tuotore wu-ñaalaa harin̄ n̄e aa ñaa wu-liilin̄, a chil ma titia wiaa, a faa nyua sinin̄ bubugi, a fa faasa didii kiasa, a yie gollo nyunyua sinin̄, a faa kpaare vuiaa maa. Vui-kpaarin̄ bi Wia won̄biin̄ ka to. ⁴ Nialiñ si bi Wia jin̄ ñaa wu-bon̄hon̄ kin̄ken̄. Lese ma bira bi ñii ñaa. Niaa deen̄ba si na ñii, u ñaaba wu-kpun̄kpere, ñii wiaa n̄e ba tutuusema. ⁵ Ama tapulii kubala, ba jañ dage wialiñ kala ba si ñaa a pi nii-la si ñaa siri duu dii ni-weyee ari ni-suunun̄ kala sariya. ⁶ Ñla wiaa n̄e tii Kirisito bul Wia wu-zom̄-la a pi nialiñ si suba maa, di ba din̄sin̄ ken̄ miisin̄ ari Wia si ken̄ miisin̄ ñii. Wia paala dii ba

sariya dunia deen ɛ ari u si dii niaa kala sariya nii. Ama u bul Wia wu-zomɔ-la a pi nialin si suba, di ba diɲsin wuo keɲ miisinɲ.

Nii nialin si laa Wia wiaa dii si maga di ba niɲaa dɔɲɔ ɛ

⁷ Bua-la dunia si jaɲ dere kpaga nɛ. Nii wiaa má keɲ ma titia woruɲ di ma siaa fieɛ, di ma wuo chuchuoɛ Wia. ⁸ Wii-la si ɲaa siifian wiin nɛ ɲla: Má hɛ ma doluɲ kala a faasa cho dɔɲɔ. Di ma nɛ cho dɔɲɔ, ma jaɲ tuto wialin ma dɔɲsuɲ tinɲaa si ɲaa cheima ɛ. ⁹ Má keɲ zile a huhuɔrɛ dɔɲɔ woruɲ ma diisinɲ ɛ, a sí wiaa gugurimu.

¹⁰ Wia joɲ doluɲ pi nuu-kala duu kaa tinɲ tinɲ-yiri-yiriba nɛ. Nii wiaa nuu-kala keɲ wii-la Wia si joɲo pu a kaa pipe u dɔɲsuɲ tinɲaa ɛ. ¹¹ Di Wia nɛ pi nuu-kala doluɲ duu wuo bubul wiaa, má puu wonɲbiin duu wuo bubul wialin si lii Wia teenɲ. Di nuu nɛ tima pipi niaa, ú keɲ dol-la Wia si joɲo pu a tima pipiba. Má ɲaa nii di niaa wuo to Yesu Kirisito ɛ a bibɛsɛ Wia, duu yirinɲ yirɛ wii-na kala ɛ. U nɛ nii-la si keɲ doluɲ ari yirinɲ a kaa mu wuu. Ami.

Hɛɛ-la nialin si laa Wia wiaa dii sí na

¹² Mi naanɲbii-kpianaba, ma sí lenɛ di hɛɛ-la ma si faasa nina, duu ɲaa wu-kpuɲkpere ma ɛ. Wiaa deenba kala ka magisema nɛ. Ma sí lenɛ di wiin deenɲ ɲaa wu-falii ma teenɲ. ¹³ Hɛɛ-la Kirisito si na, má ma na hɛɛ-la titia nɛ. Nii wiaa má jujuɔsɛ. Tapulii-la Kirisito nɛ kɔ ari u tula, ma jaɲ faasa juɔsɛ. ¹⁴ Di ba ní tuusema a tinɲ Kirisito wiaa, Wia jaɲ pɛma ɛ, bɛɛ wiaa Wia Diɲ-zɔɲ-la si keɲ doluɲ hema ɛ nɛ. ¹⁵ Má si wu-bɔɲɲɔɔ ɲaa

di niaa dɔgisema. Ma kuŋ-kala sí hɛɛŋ na a tiŋ u si kpu niaa wiaa, koo u si ŋaa gaaru wiaa, koo u si ŋaa wu-bɔŋŋɔɔ wiaa, koo u si ŋaa wu-hɛɛru wiaa. ¹⁶ Ama nii-la kala síi na hɛɛŋ a tiŋ Kirisito wiaa, u sí leŋe di hiisiŋ kɛnu. U maga di tiina denne Wia, bɛɛ wiaa niaa jima ari uu to Kirisito nɛ. ¹⁷ Bua-la Wia si jaŋ dii dunia sariya yie nɛ. U jaŋ laa sipaŋ a suomi Wia niaa lɛ. Duu nɛ saa suomiba lɛ, ɛɛ nɛ saa u jaŋ nage nialiŋ si bi Wia Wuzɔmɔ-la ka to lɛ? ¹⁸ Ba ŋmunɛse Wia teniŋ tuɔŋ a bul,

“U ŋaa wu-haa nɛ ari ŋ ŋaa tuɔ-pul tiina Wia sipaŋ, duu laaŋ ta.

ɛɛ nɛ saa u jaŋ nage nialiŋ si bi Wia jiŋ a ŋiŋaa wu-bɔŋŋɔɔ?”

¹⁹ Nii wiaa, má leŋ di nialiŋ síi na hɛɛŋ a tiŋ Wia tuɔɔruŋ wiaa ŋiŋaa wialiŋ síi to Wia wonɔbiŋ. U maga di ba joŋ ba titia kala a hɛ Wutitii Tiina-la si ŋaaba, nisiŋ lɛ.

5

Má beŋ Wia nialiŋ woruŋ u si joŋo hɛ ma nisiŋ lɛ

¹ Mi kɛŋ wii nɛ di mi bula pi ma nialiŋ si ŋaa Wia niaa nihiasin. Mi ma ŋaa Wia niaa nihian dɔŋ nɛ. Mi titia siin na hɛɛ-la Kirisito si na nɛ. Nii titia nɛ mi ma jaŋ na tula-la Kirisito si jaŋ na bua-la lɛ u si jaŋ miira kɔ. Nla nɛ tii mii sulma ² di ma beŋ Wia nialiŋ u si joŋo hɛ ma nisiŋ lɛ, ari pie-daaraa si beŋ ba piesee nyuŋ ŋii. Ma sí leŋe duu nage ari baa fugema di ma beŋba, ama

má beŋba ari ma titia tuotoruŋ. Má cho tintimii-la, aŋ sí time-la ma síi laa hariŋ to, bæe wiaa u bi maga di ma keŋ yaribieriŋ aa che moribiee. ³ Ma sí doluŋ kaa beŋ niaa deenba Wia si joŋo he ma nisiŋ le. Ama má leŋ di ba na ari ma mele zomɔ, di ba tuto ma naa-buasuŋ. ⁴ Di ma ne ŋaa ŋii, tapulii-la Yesu Kirisito si jaŋ miira kɔ, nii-la si ŋaa Pie-daaraa kala kuhian, u jaŋ joŋ ku-la si zomɔ a kii kuŋ-kala pima. U-na bi jaŋ chei. ⁵ Ma bapuosi-biisiŋ, má joŋ ma titia he ma nihiasiŋ nisiŋ le. Má kala keŋ ma titia muuri ma doŋɔba teen. Má liisi ari Wia teniŋ tuoŋ ba bula,

“Wia lii nialiŋ síi bigisi ba titia le hariŋ ne, ama nialiŋ si keŋ ba titia muuri, uu peba le ne.”

⁶ Nii wiaa, má keŋ ma titia muuri Wia teen. U ne keŋ doluŋ a wuo beŋma. Di bua-la ne yie, u jaŋ leŋ di ma ŋaa ni-balaa. ⁷ Wii-la kala síi walimema, má joŋo he Wia nisiŋ le, bæe wiaa u níi beŋma. ⁸ Má leŋ di ma siaa fiele aa pɔ ma titia le woruŋ. Ma diŋdoŋ-la Sitaani, uu gollima ne a nage naachigiŋ si gollo yele chiche kudiilee, aa che duu keŋ ma doŋɔ dii. ⁹ Má via Sitaani aŋ keŋ wialiŋ ma si laa dii kpaŋ kpaŋ. Ma jima ari nialiŋ ma si laa Wia wiaa dii a ŋaa ma naaŋbiiriŋ a he dunia seme-na kala, ba maa na heeŋ ne. ¹⁰ Heeŋ deen ma síi na bi jaŋ dieni. U ŋii hariŋ le, Wia-la si keŋ zile kiŋkeŋ kiŋkeŋ a yirema di ma ma na tula-la Kirisito si keŋe a kaa mu wuu, u ne jaŋ keŋma wasa kii, a leŋ di ma chaasa chin ari doluŋ. ¹¹ Wia ne keŋ doluŋ a kaa mu wuu. Ami.

Chuoŋlaa

¹² Mi ne leŋe Silivaanas ηmuŋse teniŋ deeŋ pipima. Mi jima ari u ma ηaa la naaŋbii-titii ne. Wu-kuu-bie ne mi ηmuŋse pima di mi ηaa di ma nyuŋ nyaase ne. Wutitii ne, mi bula pima ηii Wia si pela le. Nii wiaa má chiŋ wiaa deeŋba le kpaŋ kpaŋ. ¹³ Nialiŋ si laa Yesu wiaa dii aa hilimi Babiloŋ le, nialiŋ Wia si liisa di ba ηaa u niaa ari u si liisema ma ηii, ba maa chuolema. Mi bie Maak maa chuolema. ¹⁴ Má guori doŋo a chuole doŋo, a dage ma si cho doŋo ηii.

Ma nialiŋ kala si laa Yesu wiaa dii, ma jaŋ hoŋ ari yarifiela.

**Yesu Kiristito Wu-Zɔŋŋɔɔ (Ghana)
Sisaala-Tumulung NT Ghana**

copyright © 2014 Wycliffe Bible Translators, Inc.

Language: (Sisaala, Tumulung)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Feb 2024 from source
files dated 29 Jan 2022

b3eb8618-120f-5a96-8c1c-1dbc16914330